



Broj/Број: 01,2-50-1-2-33/06
Sarajevo/Сарајево: 15.02.2006.

ZAPISNIK

33. sjednice Komisije za vanjske poslove

Sjednica je održana 14.02.2006., s početkom u 9,30 sati.

Sjednici su prisustvovali sljedeći članovi Komisije: Martin Raguž, Sead Avdić, Vinko Zorić, Jelina Đurković i Mehmed Žilić.

Odsutni su bili: Milorad Živković, Izet Hadžić, Nenad Mišić i Azra Hadžiahmetović.

Sjednici su prisustvovali i pozvani gosti, predstavnik Ministarstva vanjskih poslova BiH, Radomir Bogdanović, šef Odsjeka za međunarodno pravne poslove, te predstavnici Ministarstva transporta i komunikacija BiH, Enisa Babić, šef Odsjeka i Mirko Šekara.

Zapisnik je vodila Merdžana Iglica, sekretar Komisije.

Predsjedavajući Komisije Martin Raguž predložio je sljedeći:

DNEVNI RED

1. Usvajanje Zapisnika sa 32. sjednice Komisije za vanjske poslove Zastupničkog doma Parlamentarne skupštine BiH, održane 30.1.2006.;
2. Informacija iz Ministarstva vanjskih poslova BiH o tzv. „Kiparskom pitanju“;
3. Informacija iz Ambasade Islamske Republike Pakistan o solidarnosti Pakistana sa Kašmirom;
4. Davanje suglasnosti za ratificiranje:
 - a) Sporazuma o razvojnoj suradnji između Vijeća ministara BiH i Vlade Republike Slovenije;
 - b) Ugovora između Vijeća ministara BiH i Vlade Republike Hrvatske o plovidbi plovnim putevima unutarnjih voda i njihovom obilježavanju i održavanju.
5. Izvještaj sa II međunarodne parlamentarne konferencije održane u Moskvi, 18.19.10.2005.;
6. Tekuća pitanja.

Predloženi dnevni red je jednoglasno prihvaćen.

Predsjedavajući Komisije je na samom početku srdačno pozdravio novog člana Komisije, Mehmeda Žilića, čestitavši mu i poželjevši uspješan rad u ovom tijelu, čemu su se pridružili i ostali članovi Komisije.

Ad.1. Zapisnik sa 32. sjednice Komisije za vanjske poslove ZD PSBiH usvojen je jednoglasno i bez primjedbi.

Ad.2. i Ad.3. Informacija iz Ministarstva vanjskih poslova BiH o tzv. „Kiparskom pitanju“ i Informacija iz Ambasade Islamske Republike Pakistan o solidarnosti Pakistana sa Kašmirom su bez velike rasprave prihvaćene od strane prisutnih članova Komisije, sa zajedničkim zaključkom da bi se o ove dvije teme, kao i o još nekim temama vezanim za domen Komisije za vanjske poslove trebalo detaljnije progovoriti na nekoj od narednih sjednica.

Ad. 4. Zatim se prešlo na 4. tačku Dnevnog reda, davanje prethodne suglasnosti Komisije na gore navedeni sporazum i ugovor. U vezi sa Sporazumom o razvojnoj suradnji između Vijeća ministara BiH i Vlade Republike Slovenije, g. Bogdanović iz Ministarstva vanjskih poslova BiH pojasnio je da je ovaj sporazum potpisan još 2003. godine u Ljubljani u skladu sa smjernicama Odbora za pomoć OECD-a o kooperativnim odnosima EU i država Zapadnog Balkana i Istočne Evrope, a u želji da Republika Slovenija doprinese ekonomskom i društvenom razvoju BiH i njenom ispunjenju razvojnih ciljeva uz pomoć međunarodnih organizacija, finansijskih institucija i drugih donatora. U ovom procesnom sporazumu o pružanju pomoći Vlade Slovenije BiH su navedene ciljane oblasti razvojne suradnje, a konkretni oblici razvojne suradnje na bazi ovog Sporazuma praviće se u skladu sa dugoročnim programom međunarodne razvojne suradnje Republike Slovenije i biće usaglašeni sa Protokolima o suradnji zaključenim između investitora ili izvođača projekata i programa i korisnika u BiH.

Nakon ovoga je g. Žilić postavio pitanje principijelnog odnosa prema rješavanju tj. nerješavanju problema stare devizne štednje sa Republikom Slovenijom i iznio svoje uvjerenje da sa ovom državom ne bi trebalo potpisivati bilo kakve daljne sporazume i ugovore dok se ne utvrdi način rješavanja gorućeg pitanja bosanskohercegovačkih deviznih štediša koji su svoje uloge imali u Ljubljanskoj banci i koji već 15 godina ne mogu doći do njih. Sa ovim stavom su se suglasili i ostali članovi Komisije, naglašavajući da su i oni u susretima sa predstavnicima vlasti Republike Slovenije u nekoliko navrata pokušavali iznaći rješenje za završavanje ovog otvorenog pitanja. Na ovo je predsjedavajući Komisije konstatirao da je ovo pitanje zrelo za bilateralno rješavanje, te da ga treba što prije inicirati, ali da to ne treba uvjetovati davanje suglasnosti za ratificiranje sporazuma od kojih BiH može imati samo koristi. Nakon ovoga, jednoglasno je data prethodna suglasnost za ratificiranje Sporazuma o razvojnoj suradnji između Vijeća ministara BiH i Vlade Republike Slovenije, sa zaključkom da se već na narednoj sjednici Komisije na dnevnom redu nađe tačka o bilateralnim odnosima između BiH i Republike Slovenije i u vezi s tim pozovu relevantni izvjestioci, odnosno predstavnici Vijeća ministara i Ministarstva vanjskih poslova BiH.

U vezi s drugim sporazumom, Ugovorom između Vijeća ministara BiH i Vlade Republike Hrvatske o plovidbi plovnim putevima unutarnjih voda i njihovom obilježavanju i održavanju, predstavnici Ministarstva transporta i komunikacija BiH pojasnili su da je ovaj ugovor potpisan još 2004. godine, i to ne samo sa Hrvatskom, već i sa SCG i Slovenijom i on predstavlja tipizirani ugovor kojim se zajednički regulišu plovidbe plovnim putevima unutrašnjih voda, te njihovo obilježavanje i održavanje, kako bi se olakšao razvoj međunarodnog i međudržavnog prijevoza roba kao posljedice rastuće međunarodne razmjene. Komisija je nakon toga jednoglasno dala prethodnu suglasnost za ratificiranje ovog ugovora.

Zaključujući ovu tačku dnevnog reda, Komisija je dala svoje mišljenje da su ispunjeni uvjeti da Zastupnički dom PSBiH na svojoj 74. sjednici da suglasnost za ratificiranje gore navedenih sporazuma i ugovora.

Završavajući sjednicu Komisije, g. Avdić je na osnovu diskusija predložio zaključak sa kojim su se složili i ostali članovi, a to je da se što prije pokrene inicijativa o održavanju javne rasprave sa predstavnicima MVP-a BiH, te Vanjskopolitičke inicijative BiH o svim trenutno relevantnim pitanjima vanjske politike BiH.

Sjednica je završena u 10,00 sati.

Predsjedatelj Komisije
Martin Raguž

Zapisnik sa 33. sjednice Komisije sačinila:
Merdžana Iglica, sekretar Komisije

Kopija: MVP-u BiH